

四庫全書

子部

欽定四庫全書

翰苑新書續集卷八

宰屬類

賀程右司

方秋崖

伏審三節星馳九關天近每慨吾鄉之氣數誰在帝傍
有如我公之聲光亦勞使傳久當召矣無以歸兮諒自
茲不出於都城將盡還大好之山水若文昌若內翰不
曰同姓為近乎有丞相有樞臣則固易地皆然耳竊幸

明公之衮衮頓曰吾郡之寥寥某未免鄉人欣聞邸報
君命召不俟駕敢問行期帝賚粥用作霖造觀制可

代賀王右司

方壺山

伏審丕承帝簡密贊宰衡子大夫入覲王庭巍冠儒科
之一左右司學為丞相進聯台宿之三式負重名茲惟
妙選竊仰省曹之叢委適遭時事之艱難邊檄縱橫而
有桀驁之裔夷京輦尊嚴而有蕩焚之孽火廟堂相語
宗社為懷是動經濟之憂允賴彌綸之畧天將平治時

乃疇咨恭惟文續古餘學到聖處以賢良三策而為舉
首人快觀先起徒步數年而取封侯上見嗟晚聿班台
佐豈久郎潛歷觀政路之聯每補侍臣之缺思皇寵渥
邁即禁塗某聞譽處之甚都讀除書而相賀天下自此
寧矣知省闈之有人主上注意倚之想巖廊之無日其
為欣頌莫既蘊悰

代賀傳右司

方秋崖

伏審渙發宸綸晉登臺轄左右司學為丞相聖訓有之

天下事皆在都曹職任隆矣惟此名家之彥足為有國之華恭惟忠義相傳詩書自許思昔乃祖膝不屈於穹廬至今裔夷膽尚寒於旄節此殆唐第一人之李揆豈惟漢十九年之子卿天寶鑒之代有聞者顧此艱難之會孰釐叢委之司乃睠譽髦佐吾元老密勿巖廊之邃相業在茲清華禁素之嚴師言具瞻某猥分邊閫遙企朝班遙覽陽暉幸際孤鳳凰之瑞願受陰賜敢忘雙鯉魚之書

代賀韓檢正

方秋崖

伏審渙發綸函晉陪政路與大臣上下其議論相業在
焉惟吾儒明習於典章國是定矣永言雅望簡在清衷
恭惟忠義相傳風流是似惟先生佐中興之運有大勲
勞繫皇穹嘉貫日之精生賢輔佐言語妙於天下智畧
湊於上前屬時多艱光贊元老斷國論而謀王體惟克
彌綸騰茂實而蜚英聲遡觀經濟行踐禁途之遽睠言
寵渥之新某切仰令猷忻聞成命聖賢相逢張治具不

在茲乎日月獻納為侍臣無出右者敬修慶牘式俟贊書

樞屬類

賀胡檢詳

洪平齋

恭審疏寵詞垣參華宥府樞機周密務講帝王之遠圖精神折衝與聞軍國之大政懽若相慶同然一辭恭惟某官玉尺端方金莖明爽文章餘事六一居士之典刑忠義大開澹庵先生之氣象曾百年幾見之猶少雖一

日九遷而未多步武幾廷編摩時政事殆如於燭照謀
何啻於淵深引而進之帷幄之中坐而籌之樽俎之上
扼奸有術制變無形相君恨推轂之何遲天子欲虛襟
而盡聽試胷中之武庫況有丹心冠頭上之進賢雅宜
綠鬢某久沉白水幸附青雲話臺上之情未入春風之
雙燕弔沙頭之影尚憐夜月之孤鴻

代賀黃檢詳

方秋崖

伏審密勿廟謨討論基命赤白囊之旁午渴聞帷幄之

籌東西府之同寅增重岩廊之勢一賢進矣四達翕如
恭惟正大而裕和高明而肅括文能附衆武能威敵無
競維人退思補過進思盡忠不遐有佐帝曰邊方之未
靖卿其樞極之是陪庶以贊萬幾之微且將制千里之
難盖真儒用而天下無敵何憂灌莽之羣今有德進而
朝廷益尊邇接夔龍之武某逃聞出綈喜欲振纓足食
足兵皆願受其陰賜且耕且戰惟肅稟於成謨

代胡尚書回趙編修

李梅亭

二日栗烈寒但感於寘冰五雲郁紛文乃工於翻水物
將其意愧在於肝恭惟某官有偉宗英入陪廟筭駕輕
就熟問津槐棘之榮噓枯吹生假寵桑蓬之賤粲然駢
儷幸此衰遲郭令二十四考之書此言何為至我魯侯
萬有千歲之頌所有更以贈君

翰苑新書續集卷八

欽定四庫全書

翰苑新書續集卷九

寺監類

賀呂宗卿

方秋崖

恭審擢從烏府董正麟宗上帝鑒觀四方獨系隆於我
宋文王本文百世思篤叙於吾儒乃咨蹇蹇之王臣糾
合振振之公姓是皆法從有偉名卿非熊非羆非虎非
龜公望久矣如圭如璧如金如錫人快觀之式顯詔草

之頻增我社粉之重某喜於賀厦出則無車猶未免鄉人豈惟可太息者六恥獨為君子所賴有達尊之三敢不彈冠佇茲聽履

賀王祕監除宗卿

洪平齋

恭審東觀策勲西垣振武金枝光裏寢高九棘之班紅藥香中獨妙五花之判朝廷盛選儒者至榮恭惟某官學根六經文起八代富貴儻來之物於我浮雲神明對越之心有如皦日萬事水流而不競孤標山立以難移

天不虛生世寧多見方領羣仙於天上忽出一佛於人間對薇閣之黃昏挹銀河之清泚言足以動武夫感泣之志行足以率公子信厚之風一舉軒昂諸公辟易度玉墀而升金掌人謂回翔首龍榜而到鳳池上方鄉用亟躋近輔丕建太平某辱軫心期忻傳手筆驚人好句曾聞御柳之飛花滿地清陰尚想掖梧之依蔭

賀岳總領除大卿

李梅亭

四牡奏最九扈升班王人不微夙序諸侯之上臣卿雖

少有光八使之間邊面歡然帝心簡在某官天材敏劭
地望穹華滿腹精神解千牛之肯綮撐腸文字空萬馬
之躊躇豈惟建武功臣之家亦習開元供奉之曲久將
餉指仍領价藩盍歸乎來遂登龍尾見知則悅聊進豹
祛卿不同乎暫掌九功之貳侯誰在矣亟庸一札之招
某共飲玻璃未覲珪玠視諸故府龍豬竊幸於同宮于
彼新田燕雀敢稽於賀厦

賀趙左司兼農卿

楊誠齋

宰延旌掾農扈為卿隣筆素之高華屬車待選相鈞陶
之亭育左轄懋功增鼎味之變調益稼疇之豐美絲言
駿發綿寓懽騰恭惟某官以篤行遺風守元臣懿範肅
雍義聚藹然禮樂詩書博厚才全恢若器能政理有淵
涵之大受無表襮之自矜審訂儀文勾稽委積疊正雉
官之規矩兩參麟譜之圖書密勿本兵從容柱史以至
位穉臣之長莫非陪廟造之功既圓西行之機仍婉東
曹之畫洪惟黃閣自是青氈常時耳目見聞無非國體

今日謀謨左右小試家傳萬務正則天地四時得其平
一言仁則華夏羣生被其澤此時參決前日講論明習
古今之典章深涵宰相之器度善類惜慶元之去國譖
者斐兮老黎喜忠定之有人幸哉如此佇從九列平貳
六官纔聽履以上星復濟舟而作雨某渺然葑菲玷此
節符曾無邊瑣之勞猥冒匠丞之渥一來古戍四閱春
暉豈利涉能於大川由裏言重於鎮鼎深虞玩惕並謹
馳驅山納數藏竊有包荒之賴雨凌風震當無脩尾之

吟甫控賀言輒伸私悃

賀黃帥除大理少卿

李梅亭

晉卿叢棘升帥前茅乘八月之槎既瞻相於斗柄回二
星之部仍典領於參旗四履歡然重臨幸甚恭惟某官
負材明允蓄德碩膚奔沅澄深得龍津炳靈之秀扶輿
鬱積繼龜山正學之傳久留金馬之坊妙斡木牛之運
中兼閭制外憺戎昭遠略折衝南人不復反矣從臣虛
位東征以公歸兮然河內競借於寇恂宜關中復留於

蕭相峻升金掌併總玉鈐公去公來信有關於輕重時
行時止俱不失其光明共羨班景倩登仙之除咸有樂
正子為卿之喜佇盡護於諸將遂進長於六官某淒其
一寒去此十暑未問五馬二毛之無用最覺孤鴻獨影
之可憐矧熬波之素封今掃地而赤立水旱重蓼蟲之
苦風景增尊鱠之悲所幸潁川黃霸之復來或察夜郎
李白之可念老牛舐犢誰敢論瓜葛之連孤鳳求凰或
亦備蘋繁之薦

代賀黃少卿

方秋崖

伏審升華遽閣臨鎮雄藩無愧六一翁方過閭而式干
木乃聞二三子至守闕而留陽城是何偉哉有餘榮矣
獨念某聿親講部遽遠師資老聃出函谷關悵莫瞻於
紫氣馬融上廣成頌徒結戀於絳帷無數傾馳庶幾在
鑒

賀曹常卿

方秋崖

某伏讀贊書諡躋宗伯文章宿老寧久法冠禮樂清卿

有華儒几蓋所謂景星鳳凰之瑞夫豈樂秋天鵬鶚之
威乃咨秩宗新我頌典當使文物聲明之盛無慙太平
經制之書上意則然吾道幸甚某出無僮馬作謁願屏
招諸生齊魯之間則俎豆聞之矣致吾君克舜之上豈
玉帛云乎哉嗣有綸音奚為綿絕

代賀袁太監

方秋崖

恭審渙發綸函晉陞繕監帝曰茲維師匠入紬金匱之
書時則有若儒宗無負玉墀之對夫以海內寡二之學

蚤收天下第一之科十年而到鳳池竊以為晚五工之
居雉正其謂斯何獨喜端人之登可為清朝而賀恭惟
緒守潔齋之訓親得慈湖之傳吾之心即周孔之心曾
何求於紙上所謂道非堯舜之道不以陳於王前方其
發諸詞章初無意於科目九萬里而風在下奚計脩程
三千字而日未斜特其餘事出用於世欲行所言第觀
使指之詳明夫豈儒效之迂濶乘輅而講荒政溺由己
溺飢由己飢駐車而談聖經仁者謂仁知者謂知洪惟

箕翼之魁宿端是青齊之福星蓋其所懷之春或者不言而化人皆憚汲黯此聲在江之東上不見賈生有詔自天而下若曰咸五登三欲帝萬世卿其龍六為七作宋一經不然營繕之勞曷盡彌綸之蘊某不量其贛敢誦所聞竊惟古之共工皆有關於世變如制度之先樸將風俗之再淳作大匠箴而獻諸朝尚何容喙讀梓人傳而知為相所願留情

賀范秘監

朱湛盧

奉上溫詔貳中祕書蓬萊道山自是神仙之宅金匱石
室肆發天地之藏仍陪經幄之游益信儒紳之貴有光
吾道久慙僉言某官制行粹精秉心諒直崇論宏議率
不詭於聖人殫見洽聞皆習傳於前輩迺於風日不到
之處更閱平生未讀之書願其高明培所植立弼就緝
熙之學對揚啟沃之休在昔伊川常以尊嚴師道自重
其侍拈廟惟以涵養氣質為先方今聖君盡選賢德既
出御於早朝之退且獨親於晚講之專人百已千莫先

郭於衆說甲可乙否間潛鼓於邇言戰和雜進於王韓
朋比漸分於牛李國勢若此大非尋常無事之時君子
居之必有正大格非之實可使端平之美不還元祐之
醇某柏悅真情蘭同切喜弱水不到第遙望於得天小
山久留知漫勞於招隱

賀趙祕書

洪平齋

恭審妙簡上心晉躋中秘典勾龍之嗣既開茅土之尊
對太乙之光爰上木天之峻諸儒相詫公族增強恭惟

某官神采珠星丰姿玉雪輯羣書而奏七畧文恢恢而
有餘馱雅樂而對三雍論灑灑而不倦蔚為朝望期大
家傳昔焉天知姬旦之為忠今則人喜臧孫之有後通
郊丘之典禮占社稷之靈長身到西崑手摩東壁在漢
則數典校之劉向至唐亦推寓直之李邕時乃見之道
將行矣聊問津於藏室即布武於甘泉某交訊雖勤望
塵猶阻少府水衡之積官事徒癡蓬萊方丈之遊仙風
可想

賀葉祕書

方秋崖

竊論宣室興思道山入直獨提麟筆兼史氏之三長寢
近鰲扉異玄都之再至每歎南省第一人之選胡為東
藩半刺史之淹盍歸乎來公論則爾恨見之晚上意可
知茲特起於借塗會立登於要路某辱居榜下每在談
間石渠天祿之得人為斯文喜巖暝林霏之留我有老
圃存敢竊問於行期容重陳於別悃

代賀高祕書

方秋崖

伏審綸綍起家旌旄載道帝讀蓬萊集歎其久去於紫
薇天開會稽圖何至獨私於綠野妙有春風之句雅宜
煙雨之樓恭惟學該玉府之森藏筆捲銀河而倒瀉舒
翹揚英轡轡宇宙二十八宿之羅胸疏條緝緯貫穿古
今千數百年之在目上帝自留而論譔太乙下觀其校
讐叢六為七作一經無紙上已陳之語自甲至丁凡四
庫皆腹中有本之書方片雲游物外之心俄半夜動席
前之問徑乘剡雪坐嘯枯山此所謂行秘書耶昔公安

在如欲用真學士者舍我其誰某髮種種以驚秋意寥
寥其厄閨雖乏益公清淨之助當驅兒童立馬以迎郊
如聞王褒中和之章喜與父老買牛而耕野

賀王校書

楊誠齋

西垣出命東觀升華太學博士之闕久勞領袖道家羣
玉之府式藉校讐綸綍疎傳簪纓胥慶某官星芒色正
雪調聲希縱橫三千字而日未斜早已魁於多士扶搖
九萬里而風在下奚獨後於諸公退然垂紳之中肯發

積薪之歎迨紬書之虛席翁輿議之歸公肆蠲給札之
科峻擢登瀛之列載惟冊府夙號清流日給大官地居
廣內無錢穀米鹽之靡密絕簿書期會之煩勞他人得
之詡作仕途之速化大賢處此諒明職守之當然稽流
畧之浩繁殫向雄之博洽會聞盛舉爰踵前脩青藜下
臨當有來於太乙黃扉身得定無待於十年某欽聆置
郵幾欲折屐蓬萊弱水雖可望而不可親草茅書生敢
以規而不以頌

賀胡校書

周平園

擢秀西州分光東壁英髦在列館閣增輝竊觀漢朝初
顯蜀士蓋山川鍾英傑之氣故郡國產俊明之材惜文
華之有餘而道義之或缺王褒待詔止第頌於離宮何
武習歌空罷歸於宣室諭意轅中者文斥邊之過校書
天祿者貽投閣之羞既何補於國家亦見輕於鄉里慨
前規之無取嘉盛世之有人恭惟某官質厚而氣清學
醇而文麗蕭邃應雅鏗爾咸韶之音圭璋璧琮溫其郊

廟之器比遠祈於駟召苦小試於閤才因古三流喻今
一體極論憂勤之要兼明利害之原謂守相皆得其人
則兵民兩獲其利願天子以清閒之燕俾羣臣言成敗
之機豈徒寧輯於坤維自可規恢於宇縣奏篇甫上茂
渥遄頒聊假道於校讐即問津於華要某幸叨發策喜
際登瀛辱陞貺於長篇寶銘藏於厚意屬緣移疾致緩
馳箋尚惟高明有以原恕

賀安太使男除將作監丞

王格齋

伏審東閣新除監丞光奉宸恩擢承戎監采衣贊畫夙
肩帶礪之盟紫煥疏榮入蓮鴈鴻之列蓋否運值將終
之會方朝廷為必勝之謀凡而脩車馬脩器械之防畀
諸扶日月整乾坤之胄恭惟某官道闢百聖忠貫三辰
方介胄易我衣裳孰殲逆黨幸芝蘭生我庭砌同決大
謀迄茂建於國功遂挽回於人極雖榮躋於京秩殊未
滿於輿評逮乘半刺之車蔚為千里之福既已無施而
不可豈應待次而後升此岳牧所以極口而薦揚談士

所以扼腕而歎息公論累年而後白除書一旦而乃來
西平有子我有臣姑陞華於武監周公拜前魯拜後行
俱幹於正機某託在所臨忻聞是舉焉依庇廕久哦少
陵廣廈之篇願假須臾更賦鄭武緇衣之什抃蹈云極
宣陳莫殫

賀韓寺丞

方秋崖

伏審出綸中禁提舶外臺聞廟堂選士大夫之庶惟君
侯可念郡國奪慈父母之愛如吾民何故其依戀者私

情所以慶快者公道獨喜紫陽之大振必為黃闕而小
留某三徑已荒二天猶在想鄉人卧轍共思煙簑雨笠
之春然舉世貪泉敢為浪舶風航之賀

代賀劉寺丞

劉後村

伏審夙戒麾符儼臨戟衛呈琅玕叫閭闔正聯星宿之
班羞崑崙薄蓬萊自求山水之郡此名此德甚盛甚休
恭惟玉篋黃鍾之函和瑤瑟朱弦之挺直雖不為表襮
於議論之際要自有公是非顧未嘗標置於名氏之間

此所謂真道學早策勲於翰墨乃課最於簿書州縣之
職徒勞人游出郎官之宰賢能之舉不待次尚參計相
之賓凡晉權萬貨之經與鈞會百工之給皆未究其所
蘊何厭聞之甚都龍左角為天田肆升華於九扈驂右
駢者刺史訖自託於一麾上若曰古君子之儒時則入
漢循吏之傳以去帝城不遠耳冀潤九里而及京師然
豈君相之意哉乃先一州而後天下聞有迅召願無疾
驅某自守其迂見謂之拙思昔中年之化今已在七不

堪之中正復陽城之生亦付之六太息而已過不自料
勇為此來一用其策之平平兩書其考之下下有人民
有社稷久矣厚顏為保障為繭絲凜乎掣肘公既至止
吾知免夫披雲霧而觀青天敢忘賀厦為草木而到君
地或可逢春

代賀余寺丞

方秋崖

伏審捷音西上除目東來雪夜馳至蔡城不專美於李
愬風聲走入淝水今復見於謝安否則孤城其殆哉吾

有此客亦重矣蓋自敵已近邊而凌中夏所謂屢不恤
緯而憂宗周孰撓其鋒徒得賣降之健將愈肆其毒久
輕效死之無人既殘浮光而逞焉若曰安豐特易耳氣
吞堅壁夜合重圍不量羶裘銳入之謀直有靴尖蹴破
之意懼亡無日卻敵者誰自非某官以國之蓋臣為今
之儒帥共話對床之風雨屢吐壯懷誓清並塞之煙塵
輒張怒髮則何以脫生靈於噤口挫強敵之雄心上嘉
乃勲休有成命某作為凱樂顙俟班師寧失智高雖頭

顧之可辨盡遜卻克何肝膽之相知式對絲綸勉旃竹帛

賀劉正字

周平園

光膺宸檢進列英躔除音甫頒士類胥悅竊以詞章既敏初何待於考觀氣業已成尚奚資於涵養然聖世重典常之守抑仕途榮館閣之登故先小試於禁林然後橫翔於冊府恭惟某官譽高全蜀文中甲科有用之才所居可紀無窮之聞隨日以升昨萬里以賜環指三雍

而振翼朝推俊又人嘆博聞始颿弱水之風即扈甘泉
之駕况審官進秩已漸於亨衢而慶賚及親又符於孝
治薦紳改觀家國同休某猥預榮觀過勤遜謝給相如
之札欲為力以何施美崔氏之莊在貪功而豈敢

代賀陳常博

方秋崖

伏審擢從學省峻立頌臺八索九丘之書既重講席五
禮六樂之教其佐秩宗均為極儒者之榮所謂妙天下
之選某屬聞誨範欣覩除綸夜寅清尚借藩房之重

日月獻納有開禁索之華於穆緒言庶幾紆監

學官類

賀楊國錄

林克齋

畫承三接晨誨諸生帝問嚴安恨見之晚士仰李渤快
觀之先斯文有光吾黨增氣欽惟昭代截若彛章至於
拔擢茂異之倫則必度越尋常之外然而由選曹而登
文石此事罕傳拔外官而議壁流近今間見天其或者
道將行歟朝暮取一人焉而羣遂空東北歸二老者而

子焉往亶惟盛事卓掩前聞某官負三十年之文聲振
一二邦之教鐸數虞庠之人物疇若老成盡漢廷之公
卿皆出薦口建白果登於華貫明揚立至於要津某逖
奉除音喜逾常等陪細雨簷花之酌豈能忘情記瑣牕
紅藥之詞今近乎識

代回李國錄

李梅亭

知賢不早聊剡需章委質相先足鳴謙德不知所報藏
弃為榮恭惟某官殖學精深摘文鉅麗早飛英於學省

即中雋於儒科固知几閭之文書難屈朝廷之翰墨為
數旬客已光文學掌故之聯無幾何時果見國子先生
之入比者公車之牘豈其私室之恩過辱臨存更勤巽
謝某無能報國惟有薦賢憑豐隆懇飛廉雖寄聲之已
晚登閭風歷閭闔猶刮目以相期

回李國正

方秋崖

簡知帝宸糾正賢關日有五色而臚句傳蓋幾年於此
矣珍潛九淵而驪珠在乃一日而收之聿來結綬之期

更覺出綸之晚恭惟某官楚東傑特斗北雄魁手抉雲
漢而分天章士皆辟易腹披琅玕而叫閭闔帝亦驚嗟
故雖居季孟之間要不在王盧之後所謂榮進之素定
夫何流落之數竒竊意鳳池不十年而身到乃今烏幕
凡幾過而羣空惟其恬然自樂而無決起蓬藿之心是
以或者相知而有扶搖滄溟之勢遙觀前席峻極除書
某起從田間序進館下曩以筆墨為崇久遭丞相之嗔
今亦詩書不靈頗貽弟子之笑每思潔已何幸同寅似

是故人恍記車中之半面不幾失子曾聞堂下之一言
願疾爾驅慰茲久間

代回曾國正

楊誠齋

晉司樂正益重儒官盈几閣之文書久勤作主申庠序
之孝弟茲遂得師恭惟某官賦敵凌雲文成翻水排空
直上合盛之白玉之堂取勢斜飛亦宜在青藜之館茲
以文學之掌故入為國子之先生矜德成而教尊必言
揚而事舉某過勤投壁愧乏報瓊化民成俗由學乎儀

圖莫助傳道授業解惑也竊幸自強

院轄類

代回龔告院

李梅亭

疇庸外轄服采中朝乃積乃倉乃糧久勤回謁如絲如
綸如綉盍賴主張恭惟某官學本家傳美由世濟京邑
翼翼恬於風月之分江漢浮浮裕此丘山之積進掌四
司之告出專一札之文諒不俟駕而行必有勿藥之喜
某淒其骯髒久此蹢躅已騰二宜去之章足以行矣猶

及再相別而去顧不幸哉

代回万俟卨院

李梅亭

渙奉明綸晉司理匭導人使諫聖上實千載之逢命汝
納言堂下無萬里之隔恭惟某官世濟其美德浮於言
練詳臺閣之儀服饗廟堂之學積勞於外益閱其中果
騰列剡之章入掌四方之牘告嘉謨於后應無不得其
言下膏澤於民亦有無窮之聞某未遑燕賀先辱魚箋
驅飛廉而寄聲恍已迷於昨夢排閭闔而披腹猶有望

於朝陽

代回史文思

李梅亭

率其屬以倨功慙於尸位簡乃僚而剡奏幸甚得賢公
義宜然私謝何也恭惟某官早收名第晚步選階鵲鷁
在原固不私詔王之爵祿鴻雁於野寧當廢治世之羽
儀茲聯事之偶同難見善而不舉惟是四六之惠則貽
方寸之慙某非曰納交聊復借重子若無言幾失子幸
暮取之拔尤君家所有更贈君無歲寒而易葉

代回趙文思

李梅亭

率屬共工已愧薦賢之不武陳篇奏記更勤博我之以
文恭惟某官天派甚清人門具慶轅駒奏步自是千里
之奇方鳩僦功未脫七階之選察其實歷當以名聞某
不勝匹雛濫長五雉同官為僚之義固已盡心為善最
樂之功更期勉力

翰苑新書續集卷九

欽定四庫全書

翰苑新書續集卷十

督相類

賀史督相

方秋崖

伏審參持國柄董護戎昭江左有夷吾而復何憂正資
妙畧中國相司馬而毋生事坐折遐衝天啟聖心睠維
王佐恭惟濟時以治安之策致主以太平之書南鄭相
北鄭相而譜世家豈特衣冠之盛大馮君小馮君而難

兄弟並闕社稷之休薦紳竊仰其經綸旒冕渴聞其論
議夜下庚牌之召席前丙枕之安廟謨獨斷於一言國
勢重增於九鼎予惟克邁乃訓已罄嘉猷天將降任是
人遂陪政路肆颺大冊兼綜全師蓋宰相外撫四夷允
賴精神之運惟天子明見萬里迄成道德之威端徯公
歸丕承帝眷某猥縻梱寄莫造庭班瞻彼熊旂徒有執
干戈之志已窮鼃技願賡洗兵甲之詩是開休顯之期
式慶明良之會

通史督相

王臈軒

牙纛行邊已近臨淮之壘橐韃請事遄趨相國之門於
穆巖瞻有如江水恭惟某官忠貫金石勲勒鼎彝世推
八行之儒豈但資兼於文武家傳三相之印皆能身佩
於安危慨茲不道之外戎敢爾荐為於蛇豕獫狁孔熾
我是用急吾君正切於顧憂匈奴不滅何以家為諸將
盡煩於指授乃約束江神而東下將鎮安淮甸以北征
謹傳豹尾之車增我龍蟠之氣以牙璋開大幕府想父

老之聚觀俾金陵為小朝廷聞敵人之聳動在此一舉
聿寧八荒某曩緣迴隔於邊頭今幸相望於江面輔贊
彌縫藏諸用惟恐衮衣之歸發蹤指示著其功願決籌
帷之勝敢忘軍禮恪稟廟謨

回史督相

方秋崖

伏以邊城分柶曾徵赤羽之勞書殿通班忽峻紫宸之
寵無因至此何德以堪豈有方辭太常伯之除而迺驟
躋真學士之冠已控陳於免牘滋愧負於賀言伏念某

本乏脩能誤膺重寄敵已近邊而凌中夏端繇護塞之
非人發不卹緯而憂宗周竊憤臨淮之多壘使宸扆莫
安於丙枕趣兵符亟下於庚牌如有老熊當道之威安
得佛狸窺江之事興言及是厥咎安歸顧雖遄走於虎
貌抑已大驚於鴻雁慨煙火萬里之氣象幾不聊生撫
山河兩戒之輿圖可為痛哭思欲自拘於司敗孰云荐
被於贊書躡登麟趾之華愈重孤冰之懼茲蓋某官潤
澤以霖雨之手包涵於雲夢之胸以其介圭入覲於王

自任天下之重得諸傅巖爰立作相每嘆人材之難微
如腹背之毛亦玷齒牙之論然端殿所以昭異數而大
相所以重中權顧惟何人敢當茲選某抗章之懇得請
為期人欲天必從之諒無勤於再命波及君之餘也覲
乃贊於一詞是謂玉成敢忘環報

制帥類

賀京湖賈制使除端明兩淮大使知揚州

鄭雪巖

運應黃旂班陞紫綬江漢之辭上嘉召公南國之功淮
海維揚今命謝傅北城之鎮威聲所至號令增明恭惟
某官詩書儒家忠勲名閥虎生三日有食牛之氣天分
素高鵬化重溟搏運鵬之風地步特異真一世之雄也
有四海之志焉量涵湖海肩與詩人文士共遊名重丘
山不恃王公大人為貴廣羊叔子十年之備足蕭鄒侯
千里之糧送目風寒不過數處倒指氣節曾幾何人如
公聞命未嘗辭難自上獨斷又煩出鎮少駐袞衣之端

召晉加政府之隆名願觀整暇之規大展修攘之志俾
長淮盡歸於經畧凡宿將皆受於指呼王室尊安邊氛
掃蕩賈文元除為大學士上意可覘呂忠穆遷自經置
司中書徑入式觀盛事大慰僉祈某梓里陳人竹符假
守歸田未獲正虞五技之窮賀厦知依喜有萬間之托
無能執鞭助甚有慙晉鄙之鄰尚備秉筆書恐可效涪
溪之紀其惟贊詠罔既編摩

賀劉制置

方秋崖

伏審疏寵帝廷護師天塹秦大夫掌北門之管豈惟增
重於麟符漢高皇無西顧之憂正欲信威於虎落偉哉
綸綍播在縉紳恭惟氣涵湖湘手扶河漢崇詩書而謀
帥肯同儒生迂濶之談脩政事以中興屢當邊鄙艱難
之會繫燿烽之孔熾肆蛇豕之無厭蠢不自量直欲投
鞭而渡耳既其歎兮誰當折箠而笞之乃睹時賢誕分
捆制坐想旌旗之改觀訖令草木之知名江左有夷吾
今無患矣中國相司馬不在茲乎某投分之深聞風以

喜隔一帶之水尚憐予范叔之綈袍下十行之書恐歸
爾周公之袞繡

賀杜制置

方秋崖

伏審進班司府分梱藩垣謝玄成淝水之勲彼酋其遜
裴度任淮西之寄我武維揚諒草木之皆兵徯關河之
入貢恭惟以少陵之詩名而自比於稷契以阿房之賦
手而高論於唐虞精神之折遐衝不愆於素謀慮之懔
勅敵克壯其猷故能全孤城於百戰之餘於此見真儒

為萬人之傑既勒銘於丹地乃授鉞於青冥顧惟風塵
瀕洞之秋要有意氣激昂之暇平居推赤心而置人腹
其孰不懷緩急蹈白刃則得士情何戰弗克矧天意之
滅敵適歲星之照吳國豈賴盟兵無撤警惟事事備乃
其無患願修軍旅之定規言人人殊則罔成功更極賓
僚之高選聿觀偉業丕對殊褒某密邇鄰光謹傳帝賚
闌以內闌以外喜盡寄於爪牙陝以東陝以西願相依
於唇齒

賀李制帥

方秋崖

恭惟誕開制梱居守留臺南浦雲飛虎節占使星之動
北門天近麟符分卿月之暉於皇玉壘之威增重金陵
之勢帝意若曰時分顧憂盜亦吾民何至帶牛而圜起
邊有勍敵幾欲牧馬而內窺使長江得人如孤羆之據
深叢則絕漠之域寧匪兇而率曠野繼我宗彥維時人
英恭惟風神肖老聃之仙文物孕長庚之秀維弼畫河
朔十三策每慨然於俎豆雍容之時而敢為小范有胸

中百萬兵雖投之於羽檄交馳之地而不亂粵從鸛陞
出擁蜺旌遂令落霞飛鷺之墟茂有明月吠厖之警乃
睠陪京之重通司留鑰之嚴俾盡護於列營諒聳聞於
遐裔蠢彼小醜耳當折箠而笞之如吾中原何且傳檄
而定矣用底碧幢之績遙觀赤舄之華江左有夷吾而
復何憂久歸朝望中國相司馬而無生事已折敵謀皇
矣吾儒偉哉此舉某屬聞綸綍如拜麾旄人一天我獨
二天覬重啖安期之棗行百里半九十里適將熟楚戍

之瓜寧少俟於須臾幸無忘於疇昔

賀尚書李制置

劉後村

昕廷出命天塹宣威九十年王氣鬱葱莫重居留之守
數千里風寒衝要盡提表裏之封疏恩冠學士之班涓
吉建元戎之纛名聞強敵勢在本朝竊以冠萊公之鎮
北門契丹服其望重范文正之理西夏元昊懼而膽寒
使方面隱然有人則吾圍坐以無事在昔建業實今陪
京清宮以待翠華督軍而假黃鉞綠沈金鎖帳環百萬

之精兵帕首腰刀庭列諸屯之大將近者之事異乎所
聞削階級之常儀講苞苴之私覲屈主帥節旄之重接
偏裨杯酒之歡避廉頗而引車嘻其甚矣驕灌夫而罵
坐誰之過歟是必清德足以服其貪慄之心威名足以
折其桀驁之氣使元和愬武郊迎裴度之來若南渡張
韓羅下魏公之拜庶紀律嚴而名分正號令一而賞罰
行此雖書生之大言可裨幕府之末議況江左一隅之
生聚恃淮南兩路之蔽遮今也久虛曠土而不耕多築

空城而難守逃亡竊發或保光豐之間覘謀不明莫知
泗壽之事遣聘屢通於邊境閉關不納於流民凡此數
端言之短氣肆天子奮英明而推轂而我公亦慷慨以
登壇方恢宗祏之遠圖非講門關之私賀某官名滿九
牧氣塞兩間文武有威風縉紳無出其右緩急屬大事
社稷所恃以安勲名著於納刀討賊之時讜論見於正
色立朝之日畫江絕棧狹小孫劉之規模富國強兵鄙
夷管晏之功利言言大義凜凜精忠人方獻餌敵之謀

公獨抗出師之表皮幣犬馬珠玉何異借寇兵而資盜
糧軍路籃縷山林方將傲國人而討軍實朝廷重於九
鼎君相倚如泰山寶帶萬釘已峻真文昌之拜牙旗十
丈有光大元帥之行奉壽母之潘輿攜諸郎於謝墅覽
前古六朝之形勢陋過江諸人之經營何止問冶城而
訪新亭不必築濡須而守渦口龍蟠鍾阜行將扈蹕以
東征馬飲長江永絕投鞭而南下少試平戎之策遂成
闢國之勲兵事節度付公允藉中權之整天下安危注

意方當左轄之虛環召繼來袞歸不遠某早依儉府久
出膺門上光範之書初無夢想誦子虛之賦屢薦姓名
力啟化鈞使霑祿米書思方切誰復憐莊舄之吟豪氣
雖衰未忍作楚囚之泣公方紀旂常之成績僕亦思竹
帛之附名非敢為栖栖乞食之容庶少施颯颯草檄之
手斬名王而釁鼓縱莫隨瀚海之師鐫大字以磨崖請
繼作浯溪之頌

賀沿海趙制置

善湘

楊誠齋

恭審宸廷作命制關澄威公衣錦以居鄉四輩趣朝於
魏闕士持戟而失伍一言靖患於蕭牆海水無波天顏
有喜恭惟某官高明而傑特沈厚而疏通睨天下之英
才孰出其右運胸中之武庫所向無前江淮十年旗鼓
百戰指畫斷匈奴之臂談笑取郅支之頭大勲赫奕於
旂常靜樂婆娑於泉石時方多事吾豈久閒蜀國何茫
然超一琴於清獻鄉鄰有鬪者驚三箭於將軍方按轡
以拊循亟投戈而羅拜匪洛社公台有賴疑潢池兵弄

未休吏皆趨廷帝且避席灑堆如象焉用泛東吳之艘
渭水非熊亟入運西樞之柄息烽煙於邊鄙壯磐石於
邦家某江國晚生天街末士登龍門而未遂運驪駕以
何堪連讀綠綈簪瞻紫氣晉公之貌孰似庶諧道右之
迎大農之穀幾何庸上關中之計其於慶倚莫既編摩

賀聶侍郎除制置

李梅亭

躋班禹閭宅牧蜀都輟言語從侍之臣盡護諸將藉文
武威風之帥式遏四夷渙號風行坤垠雷動恭惟某官

氣噓海岱胸湛冰霜善刀遊肯綮之間金牛立解意匠
淡經營之表凡馬坐空惟其日千里而有餘是以歲九
遷而無歎驚臺鳳閣積彌縫輔贊之功螭陛雞翹弘獻
納論思之益上矜遠服中遣近臣弄印無以易堯爰峻
西清之職披圖指以示禹俾圖北伐之功惟真學士象
十二月之班而大府帥總六十州之重獬豸匪茹須方
叔之壯猷皇帝曰嘻命崇文而奉詔不但洗岷峨之愴
又將蕩秦隴之妖王壘既安金甌必啟某五年承乏百

技已窮賴公為父老而來許我託子孫之契田間索粟
看即騰新尹之誇門外種瓜便可遂故侯之隱

賀張魏公除宣撫

楊誠齋

召升亞傅命撫征師太上皇非不知耆德之深留遺嗣
聖新天子欲盡復中原之舊首擢我公於皇彼天將降
是任必有所試使大其成彰之於大夫破斧之時凜其
不折啟之於族庖更刀之後用則無前厥惟相之夫豈
人只恭惟某官道德之溫如玉忠義之明於霜扶炎祚

而置諸安皆本其力遭讒邪之壅於上益增其光一飯
不忘於君尊四海惟愁於公老今而復起時正可為仰
涵養之素優諒規模之先定辯幕孰智齋壇孰才形勢
於何而居強敵情若為而得實民之奠安將有日國之
恢復必有期得一韓以在軍中倚而須慶歷之捷捲三
秦而取天下當不使漢高之淹然後布大冊之焜煌冠
維師之崇極歸相興運納民隆平某于役載奔置郵以
告喜不能語豈特以知己之進庸義動於心端復為本

朝而欣賀

賀字文宣撫除閣學

黃雲溪

宣閭疇庸昕廷疏寵伸威方面久煩太常伯之尊進律
穹班庸躋真學士之職絲綸誕布紳紱均歡某官望隆
本朝譽滿當世周旋班署已聞革履之聲鎮撫淮襄美
破羶裘之膽洪勲偉甚輿論翕然粵從簡眷於嚴宸峻
若官稱於名閭雖論功莫及未殫褒報之儀然竣事來
歸即正登庸之位某剽聆成命喜激懦衷飛燕翩翩正

馳情於廈屋繡韉隱隱佇緩步於沙隄

賀董制使除金陵

鄭雪巖

召環西掖甫登豹尾之班護鑰北門復鎮龍蟠之地令
公天子周道日明命布朝廷威振華夏恭惟某官步步
踏實存存閑邪日所為夜可焚香初無暗事戰則勝祭
必受福常有敬心當粵人之交攻受陪都之重寄蓋謂
同舟而共濟何患推車之不行入罄孤忠已得公道集
衆長之意載加深慮又恐草野生敵國之憂知非艱行

惟艱防有患故無患為國家有道中庸九經行以誠攘
外侮無他采薇三詩先自治此則真儒事業足為長治
規模蔡謨謂混六合濟蒼生非時賢之敢望王吉請為
萬世建長策豈俗吏之能為舍我誰哉屬之子矣所繫
甚大尚望力行某良厭官癡粗知師說一麾出守已攀
夫子之牆四牡蒹華尚在太公之履耳聞踴躍心喜依
歸倘有腹心之言何敢自默自今指臂之運尤當敬承
炯炯欲陳拳拳未竟

回荆湖趙制置

劉後村

西清寓職幸聯中禁之班南紀宣威密倚上游之重昔
嘗忝同寅之事契今共分一面之顧憂江漢相望正如
唇齒邊陲是急未布腹心辱貽翰之相先愧脩詞之不
敏某官康時志大經世才周歷塊過都掃清冀野之北
離羣絕類獨步衡湘以南自結九重之知不階尺寸之
援褰帷出使一道澄清緩帶臨邊累年靖謐屬者敵來
犯塞公不顧身陳宣王復古之詩讀諸葛出師之表英

概凜凜寧退保一隅之偏義旗堂堂有北向中原之意
戎馬既退漢波隨清由渚宮而趨樊城已張先勢經磧
鹵而絕大漠行紀雋功某久綴索班冒當閫寄自抵司
存之始即聞警報之來枝梧至艱罅漏方濶每念風寒
之宜護詎容脈絡之不通有來好音協濟茲事瞻羊公
於峴首阻趨鈴閣之嚴依劉表於荊州竊有寶鄰之幸

到任上趙制置

朱湛廬

西道回車易乘一障東藩制閫廣庇萬間荒殘之餘風

寒尤甚適我乃願得其所依皇皇者華嘗望洛陵之氣
離離彼黍因過汴京之宮得再拜於膝前取一言於堂
下太史公牛馬走不能從焉北平王龍虎人未嘗忘也
乃小壘三家之市瞻元戎五丈之旗托茂蔭以棲遲憑
英聲而激烈今知幸矣天實畀之恭惟某官愔國威名
傳家節概平生勁氣干雲漢以上征一片壯心勒燕然
而後已粵從南渡隔絕中原惟宗大尹欲速渡河與張
魏公敢屢抗敵前汪黃之見沮後秦史之力排睠焉興

懷為之太息旦夕偏安之運天意應旋累朝正統之傳人所共屬比成師之順動本大義之當然諸葛七擒非逆知於利鈍孟明一書終足霸於懼思若其披攘荆榛汎掃陵廟擣空狐兔之穴毆去蚊蟲之羣能令遺黎尚皇靈之有望不使後代謂本朝之無人此其不言之功必有能辯之者今則朔風猶勁太白益高莫予莽蜂先除淮海之螫非我族類更靜青徐之氛庶丕集於殊勛用光傳於不朽某已疲行役力請叢祠未嘗有材莫救

搜林之斧靡遑寧處仍叨並塞之麾固催科拙政之宜
先尤備禦大經之當請況在宇下得咸與以維新若內
溝中願恭承於嘉惠

代上李制使

方秋崖

舐鼎餘五色之丹曾附淮南之雞犬棄車下千金之骨
不遺冀北之駑駘敢陳眉目之畫更借齒牙之論蓋待
以國士則雖至於再且至於三而何嫌亦豈無他人謂
特知其一未知其二而奚取莫若參苓之舊又觀桃李

之新竊仰睠慈寧以瀆告伏念某苦無奇氣亦有壯心
舉眼視八荒綠髮已霜蓬之短折腰為五斗青衫半荷
藥之枯然雖碌碌州縣之間未肯瑣瑣簿書而止思昔
蘭亭之禊適熏樂籠之芬予不負丞丞亦不負予惟倚
春風之信鳥能擇木木豈能擇鳥久棲明月之枝公為
此來時已自慶竊以為兩地之相望皆適在二天之所
臨意其造物之與謀或者功名之見逼安用不鳴之雁
覲搏已化之鯢恭惟轉洪鈞而萬象春持清議而一諾

重方出而將入而相其紀之旂常而勒之鼎彝雖耕者
農戰者兵皆歌於田野而賀於軍旅凡百奔走願一品
題乃若生識韓荊州曾到花邊之洞安得近舍皇甫湜
他尋李下之蹊亟以此懷布之明聽予取予求而不厭
詎曰前日之是今日之非自棄自暴而弗陳則恐不失
之瀆而失之悔請推盛德儻賜真知

通安制使

洪平齋

伏以乘傳西征窺卧龍之事業樞衣北面請流馬之規

模遙引睇於戎垣預徹忱於籤府恭惟某官望高熊耳
氣壓峨嵋觀聖人之道自孟軻闢楊墨仁義而不作任
天下之重如伊尹集夷惠清和而大成節可寄命而託
孤志惟忘身而徇國屬蜀有漢之變於漢無蜀之形人
皆波流公獨壁立定羣疑於履虎決大計於投龜慷慨
北軍左袒之呼笑談匈奴右臂之斷一清井絡重立坤
維寢高方面之功增重股肱之寄其收拾人材則號稱
小朝廷之盛其鎮撫蠻徼則知有天可汗之尊邊關萬

騎之秋風野足一犁之春雨屹然玉壘倚若金城功昭
日月之旌常名固山河之帶礪官雖兩大德則一謙陝
以西召公主之小屈碧幢之駐斗以南仁傑而已即看
黃閣之登某晚景侵尋宦途勃窣方折腰就再麾之役
又躡足為萬里之遊喜密拱於使天幸曲成於恩地沂
灕瀕之三峽未足驚魂棲鄧林之一枝庶安孤影

通安大使

王格齋

身無功狀難久污鵷鷺之班帝有恩言俾往牧魚鳧之

國出國門而東驚歷吉日以遐征惟遙瞻大幕府之宣
威竊自比小諸侯之述職蒙塵庶其免矣馳敬其敢後
乎恭叩和門具陳忱悃伏念某學不適用材亡踰人身
類蠹魚生死不離於文字心如斥鷃飛搶在止於枋榆
不圖宦牒之推移浸被朝端之任使謀猷何有誤寘屬
車豹尾之間志願無他已作閒館珍臺之夢偶值坤維
之謀帥專承巽命以充員靖言差擇之所由非有勞能
之可錄意其溫恭有恪必能寅奉於教條察其悃悞無

華或可惠綏於田里肆加臨遣俾備馳驅自知不稱於
所蒙其若牢辭之弗獲某官受天間氣為國重臣手剪
逆傳帶礪遂盟於偉績身當強敵金湯不在於長城相
時社稷之大勲式簡冕旒之隆眷徒得君重託西陲半
壁之天行以公歸扶黃道重輪之日尚憐孤拙曲借優
容陰雨之膏黍苗深切沾濡之望廣廈之庇寒士不勝
歸倚之私

通吳制置

楊誠齋

拔處士於洛北豈徒苟尺寸而遠來遇先生於石丘可
冀布腹心而後別惜也孤蹤之萍梗居然良晤之參辰
獨惟執訊之恭可效願忠之悃某官學窮百聖望冠諸
儒超然壯猷擊南溟三千水而直上恢乎曠度吞雲夢
八九澤而有餘儻非事變之繁興孰信真儒之可用方
北敵長驅之日微公幾至於寒心迨西陲甫定之初所
泣急還於奠枕惟己之所蓄者厚故措諸事業而無難
惟人之所信者深故不動聲色而自服茲顯庸之茂者

承溫詔以趣還切聆裏言將有巨用某庸虛一介坎壈
百罹雕蟲篆刻乃壯夫之不為既已無遭於場屋豫章
橘柚非老人所宜種又將絕望於榮途顧嘗參諸老之
後塵未忍為鄉人以沒世書寧稀價頗欲為後世之傳
句不驚人殆有甚市朝之辱自斷此生之永已不期當
世之誤知纔賦支離十束之薪旋辟阮瞻三語之掾求
芻飲水平生無溫飽之心毀瓦畫墁何策塞曠瘼之責
身雖縻於籠檻夢已墮於枌榆所望我公盡究賢人之

遠業庶容僕輩歸作昇平之幸民繫戀惟深名言莫既

通董制置

李梅亭

十乘啓行既孤剡牘三年過隙又玷招羅曾微曉暢之才可答頻煩之顧疾驅行李往役前茅伏念某學餒而材無氣凋而力腐少年妄意頗懷竹帛之功名半世拙謀未了布韋之事業強為祿仕直坐飢驅諸公貴人間欲出其門下古來此物自當棄之道傍獨銜國士之知積愧文人之厚因同邑而薦嚴助自古有之未下車而

辟慈明此恩莫甚窮人命薄中道憂歸勞心博博鑽火
頓驚於三蟄達官袞袞刺天難附於羣飛止或尼之會
且歸矣駭置郵之有命仍尊選以見招惟兩喜多溢美
之言故再鼓回愈淡之聽奏函朝徹俞音夕頒荀文若
之不進不休今寧愧古閔仲叔之且喜且懼寵實若然
茲蓋伏遇某官以社稷臣為詩書帥留泰階台符之步
撫坤垠井絡之民去來關雪山之重輕出入係蜀道之
難易公鎮踰歲月共期裴相之來歸小隊出郊垌復喜

嚴公之再駐羣彥固多於集幙匹夫猶恥於納溝龜放
長江使認重來之路燕尋故壘復窺新捲之簾豈但顯
不遺故舊之仁亦足覘雜進巧拙之量其敢不循其頂
踵銘在肺肝謹無負有志斯世之言仍每守圖利大夫
之戒忽騎將軍馬難希處士之壯懷直釣錦江魚敢學
拾遺之懶性

通淮東趙大使

吳荆溪

撫劒悲歌誰信古心之激烈驅車遠邁幸逢人傑以歸

依庾臺之畫諾雖卑連帥之統臨奚間既叨所部不是
宜曹某官氣蓋諸公名喧八極忠肝義膽挈日月以懸
冰霜妙畧沈幾役鬼神而簸風雨粵自先正卓為宗臣
保三邊奠枕之安壯萬里長城之勢肆令有子亶號象
賢當克渠搶擾之秋正內地危疑之日衆人却顧不勝
繞指之柔一馬直前獨奮捐軀之勇迄鯨鯢之就戮舉
鴻雁以安居禁直從班未大酬於偉烈侯藩制閭猶曲
倚於深籌養銳以須乘機而動縱未復闕河之境土猶

應洗淮蔡之腥羶使大勲著於旂常而盛名光乎竹帛
豈惟我公之素願固亦寰海所共期乃知爵位之穹隆
要是英雄之緒末某塵容易老凡骨難仙空讀古書尚
真詮之未悟浪談世事豈腐力以能任濫陪膚使之末
僚偶出公朝之誤獎念疆場之多事欲問閭之少蘇非
洞明歛散之權恐坐失凶荒之備自慚庸魯何補咨諏
惟仰藉於庇庶粗逃於瘼曠通融民食倘無流離溝
壑之憂保護人和即是捍蔽封疆之本

通李制置

朱湛盧

分楚服以殿藩冒膺寵數控吳都而制閭近接聲光星
聯軫埜以在天水會江流而宗海志同氣合牋往神馳
某官伊呂佐王之才班馬傳家之學淮壩八議篇篇玉
鑑之秋帝學一書字字金莖之露曩遊碧落密侍清光
挾雲漢分天章將上規於典制呈琅玕叫閭闔請下採
於芻言身歸岷峨名滿宇宙除以外庸之績總此要衝
之權昔天下曹劉走馬跳兵之地廼禁中頗牧輕裘緩

帶其間根本內強風寒外護若周公瑾之方略與陶士
行之經營使人慨興千載之思惟公豈在二人之下江
山如舊斷無烏鵲之南飛宛洛可依尚使熊羆之北走
將並恢於上策以共濟於中興某舊辱深知今慚並命
在珠側而我穢幸鄰照之見分其波及者君餘愧上游之
不逮

翰苑新書續集卷十

欽定四庫全書

翰苑新書續集卷十一

經畧類

賀廣西胡經畧除待制

真西山

新朝渙號次對升華千載風雲榮事權於桂管九天雨露進班序於松堦紀先皇方面之臣儀光廟圖書之府鉞幢增重嶺海均懽恭惟某官百年砥柱之家三相棟梁之產周流事物曾無錯節盤根並濟恩威自是輕裘

緩帶陰清棠部愛滿桃源歛江湖之激濁揚清為水鏡
之旌妍別醜流連鍾阜饋餉金城上卿之調度春容邊
鎖之風寒嚴密界二十四州之廣袤襟制百蠻極數千
萬里之茫洋琛航九貢鎮以無事熙然不驚尋丹洞之
勝遊燕黃庭之內景茲者龍飛南面鯤化北溟風行誕
布於十行山立遙登於兩禁偉先朝之忠簡立大節於
艱難宗廟社稷默焉有扶天地神明臨之在上遐邇動
色阜陵念功報之未見其涯留以克昌厥後仲兮駟召

聽履上星伯也間分簪筆持橐常棣相映汗青有光思
魏徵則用魏謩寧論今古奇韓愈當先韓會豈但文章
況元祐已新初年則長公宜大宗伯何妨夾輔矧曰同
朝某被服典刑傾馳歲月惟吏鞅牽聯於疆場而塵襟
汨沒於節麾責萃其躬事多於髮汙無涓溜可掩鴛疲
顧因牡駕之頻年迺許雉工之涉筆雲垂覆露波及品
題身託萬間奚止詠歡顏於風雨心期一節誓將凌晏
歲之冰霜

通唐經畧

劉後村

奄四封而賜履咸仰威稜踰五嶺以乘輅適依節制輒
干六纛冒輶一牋某官識極精微氣涵剛大太阿出匣
孰敢擬其鋒銑老柏參天略無傍於枝榦靡繇援手自
簡上心頃我豸角之初屢聽鳳鳴之舉言及乘輿事關
廊廟安知疏入而跡危心存魏闕身在江湖不以名高
而色喜甫建臺於江介俄開閫於嶠南龍戶馬人競來
衙謁蚌胎翠羽暫免搜求一時之饗吏革心千古之貪

泉刷恥昔者廣平之入尋踐台司迨夫君嚴之歸亦登
左轄佇觀新渙賈掩舊聞某久矣荷鋤偶然易節居里
每勤於存問起家亦自於吹噓屬茲滌籥之初竊有摳
衣之喜譬蠅附驥雖莫企於騰驤若驂從輿庶粗知於
向背

通唐經畧

王臞軒

誦諸葛出師之表久起敬於油幢為毛義捧檄之遊行
備員於鹺局士莫重乎始進天固使之有依三薰竿牘

之恭百拜旌麾之下某官出處之節皦如日忠孝之心通乎天筆下無一點塵埃富大蘇之文采胸中有百萬兵甲負小范之經綸惟中原久淪汚於腥膻而殘敵尚陸梁於疆場士狃於東南之懦習皆諱戰而喜和公熟於西北之事情謂有進而無退止楚囚之泣而作其氣焚石勒之幣而挫其鋒仗大節以臨邊馳一封而詣闕忠誠憤發可質列聖在天之靈大計堅凝將有兩河拓地之喜未逾旬而來四方之豪傑不終日而易萬人之

衣裝捷凱載塗羣雄褫氣其如功高而人見忌名大而
世莫容方弘愬協謀俱受晉公之節制及魚程反間遽
收郭令之兵權浩然袖手以來歸識者撫膺而太息然
公論常如日月一食何傷而雅志已在煙霞欲留莫可
帝思南嶠之最遠詔以元戎而啓行幡然以轟雷閃電
之威歛而為陽春膏雨之惠坐閱黃灣之落木足助吟
哦笑飲石門之貪泉不移清介鯨波恬靜龍戶驩呼魚
理民將畧之長皆平生學力之驗人望之在執事萬口

同辭天意如欲中興十行亟召遠則宋廣平之登輔相
近則蔣穎叔之任樞機留衣鉢以相傳紀旂常而可待
伏念某聞道最晚賦才甚涼弓治承家期復青氈於再
世草茅對策濫收黃甲之乙科教忠方勉於過庭遭難
何堪於陟岵意造物乘除之有數使世緣涉歷以稍深
謀養斗升七稔寒飢之既苦失身筦庫一官猥屑而亦
甘不圖初筮之遭逢乃得大賢而師事惟是傳癖書癡
之素習拙於笏畫鞭算之良籌誓當自拔於濁流不敢

取尤於清議服鹽車垂兩耳姑強顏陪屬吏於此時鐫
浯石紀萬年願執筆從先生於異日

回廣西李經略

李梅亭

荷囊輟直桂管分符靴刀列郡之迎古稱大府襦袴萬
家之喜今在細侯仁氣南驅善聲東迤某官通材治劇
厚德鎮浮財貨本末源流早振地官之職侍從論思獻
納晚深天辰之知遽厭承明之廬歸拜散人之號時方
多事公未可閒謀帥須賢起家甚寵若衛公之鎮撫九

十六郡與襲志之都督二十八年能安越人莫非李姓
宜其苗裔復此蕃宣顧恐青羅白玉之江山難駐黃閣
紫樞之步武某龍鍾已久燕賀無由夔府竹枝之歌既
成昨夢漢節梅花之句願寄故人

安撫類

賀趙安撫

鄭雪巖

伏以鳴武城之絃歌昔棲燕厦被皇華之禮樂今傍麟
符密借吹噓再諧際遇十連作帥一道登車相望帝畿

實同王事賢者在上引其類協恭和衷使臣受命周于
詢以小比大雖由熟路實正餘波恭惟某官聖代吏師
宗盟元老春生秋肅藏神武於不殺之中乾轉坤旋杜
禍患於未形之始詎筭不設而情得鈎距無施而姦銷
權衡百物之低昂準則九農之賦歛人謂多多而益辦
帝嘉休休而有容歷數京兆尹以來誰能並美只恐太
常伯之任未足酬勞某久辱眷知游蒙汲引逢人說項
顧何取於師門為國舉張曾不移於薦藁方常平之弄

印合僉論以廷敷思不復見壽昌公私多病謂莫如召
杜杞咨度非難顧有忝於甄收偶不期而符合雖大造
弗私於小物亦先生垂意於舊僚念激濁揚清固京畿
之甚急然移風易俗豈庸儒之所能幸召公之憩棠尚
存而潘令之種花未遠得所依矣廣而充之有光於原
隰間備宣上意流化自京師始敬拜下風輒貢謝書莫
酬賀語

賀杜安撫

方秋崖

伏審渙發綸函晉登藩岳勲業聿高於淝水聲威誕播
於淮壖恭惟國之蓋臣今之儒帥崇詩書說禮樂窺聖
域之妙而探其心安邊境立功名闢武夫之口而奪之
氣此所謂有用之學賴以濟多難之時故雖鼙鼙之夜
嗥頓驚風鶴而宵遁肆頒一札增重十連帝曰俞哉有
夷吾而何患功亦偉矣召季布而可知某聞命云初溯
風以喜兩淮猶左右手正資運掉之勞九重披輿地圖
更紵經綸之畧敢因慶幅以贊壯猷

賀任樞密帥福建

李梅亭

元老得閑价藩出牧道古今而譽盛德既將相之兼資
至將相而歸故鄉在古今而有幾適觀全德足立懦夫
某官輔世真儒爽邦良弼春風沂水夙卑游夏之淵源
界雪岷山更陋卿雲之河漢早克勤於小物晚服在於
大僚非仁義莫陳於前有謀猷乃順於外雖風霆不顯
流形之迹然天地能知體國之心用兵數年拓地萬里
疇若予采方當顙面以正槐民具爾瞻何遽剖符而分

竹拂衣勇甚懷綬忻然問之徃來皆云昔疾而今愈
決於去就足窺衆醉而獨醒為之兆兆足行奠而發發
必中全閩鄉部祕殿政塗尋某丘童子之釣遊聽去時
兒女之笳鼓所貴於天下士者動靜不失其光明豈不
誠大丈夫哉進退一歸於禮義不負所學是在我公林
下有人少伴越地禽魚之樂橘中未老尚見商山鴻鵠
之飛某夙累公知敬為國賀江空而歲月晚載歌百年
幾見之詩水煩而鱗介勞更致列城一陶之請

賀黃侍郎帥福建

黃雲溪

力辭禁門出殿帥閫十乘自天而下實輟言語侍從之
臣七閩在國之南今得詩書禮樂之帥爰進松階之直
用光竹使之符麾幟遙臨旄倪咸喜某官學博而道大
行厲而氣清淵識過人稟著龜之先見孤標映世儼松
柏之後彫險夷遍歷於兩途濕燥靡渝於一致頃當飛
龍之始早登冠豸之司屬元惡之專朝排之心苦提孤
身而去國聞者瞻寒迨聖化之改絃副宸衷之側席召

登九列旋置六聯政使少留穿延和之隊仗胡為勇去
分長樂之左符睠八州之提封視諸道為樂土肆升次
對益表優賢鎮撫餘閒未妨挹三山而覓句便蕃異數
會看趨西地之催班某早以受廛阻於賀厦慚無好語
敢賡岳牧用詢人之詩庶幾異時願作聖主得賢臣之
頌

賀陳待制帥江西

戴象橈

光奉王綸大開帥閫整頓吾閩之天地方笳鼓之歸來

洗清江右之風塵又旌麾之暫出踴躍吏民之喜歡呼
父母之來恭惟某官橫水孤舟擎天一柱事業皆自六
經出得北山先生家學之源流人物若以三國言真南
陽老子王佐之才畧筆下不私一毫賞罰胸中莫知幾
萬甲兵未暇以小小設施者言之請舉其彰彰勲績之
大者歲在己丑盜起潢池聞諸父老之言自有此汀邵
未嘗有此寇或者顛危之際若無我招捕則亦無我民
福星一路之歌謠生佛萬家之香火然能以身任朝廷

責擔不以賊為君父憂有是駿功盍登鴻輔帝念江西
數郡凡幾罹兵旱之災卿實斗南一人姑往任軍民之
寄一札朝下單車夕馳界上有此我杜公非汝杜公之
爭軍中謂今小范老非大范老之比方其壓境首誅八
九渠克譬諸奕棋此最第一高著典刑既正風采可知
它盜自束手以願降汚吏亦革心而退聽蛇虎之害既
去鴻鴈之居自安不勞指麾悉就條理民何幸甚天實
憐之星分翼軫地接衡廬幸早了一方之規畫川用舟

楫旱作霖雨即大施四海之經綸某渺然書生冒此邑
寄每嘆孤寒之無援惟知職業之自脩幾番心火之憂
焦頭驚半白三嘆人生之遇合眼孰回青茲幸遭臨照
之天是真獲依棲之地第當大帥涓吉開藩之際適值
小吏謁告還舍之時既不能負弩以先驅且併與慶函
而後至茲方還戍懼莫逃愆江湖之聽鳧雁去來仰祈
涵育天淵各遂鳶魚飛躍尤賴作成

賀陳招捕除提刑蕙安撫

王耀軒

龍門高峻屢容寒峻之攀麟序荒涼復受使華之察豈
造物憐其困躓使末路有此遭逢敬飭墨卿晉干籤帥
恭惟某官清融氷柱峻拔斗杓古堂夫子之雲孫學問
有本北山先生之嫡嗣名節傳家方當杲日未東之時
已有伊吾以北之志披肝許國掉舌籌邊雪衣貂裘慷
慨辦太原之檄風聲鶴唳笑談却淮甸之兵草木知其
威名邊裔問其年貌屬當鼪鼯之為梗羣然鴻雁之離
居嗟懦俗之脂韋仗元戎之斧鉞毅然以身任朝廷責

誓不以賊為君父憂卯受命辰即行有崇文之勇決申
上奏寅報可從充國之便宜南州嚴保障之雄西師習
號令之素如盤王之治廢疾半劑而蘇如國手之救危
枰一著即活凱奏紛紜而載路壽祠突兀以連雲上甚
念功就畀以繡衣之命時方謀帥復假之牙纛之權兵
刑之脈絡相通臺府之風稜益壯所以寬宵衣之顧慮
豈徒誇畫錦之榮煌如聞邊頭交馳露布知取勝而莫
知持勝易納降而未易處降安保今日飢鷹之來歸不

如向者猛獸之反噬舊讐將殄新敵方張當趣公入覲
之時要佐宋中興之烈濟時方畧已優南渡之諸賢蓋
世功名便了北方之大事伏念某老之將至銳者已磨
一罹語穽以來三閱歲筭之久士不得志宜追誓墓之
風貧能驅人至草間釣之賦無力可因於熱屬抗顏甘
就於冷官若何免蜀雪之嘲所恃有蘇天之庇腐儒無
用宜束高閣以待太平來事可為將磨石崖而頌大業

賀江西李安撫

戴象麓

榮遷外府寵寄元戎內閣陞華光射斗魁之次南昌申
命春生帝子之都瓌望愈隆輿情胥慶某官人物琳琅
於昭代家聲儀表於端朝老成重厚如倚泰山而坐平
原洞達疏通若駕輕車而就熟路自躋臚仕屢展壯猷
惟好儒之君以未能得天下英才為朝廷羞惟憂國之
士以不獲行聖人實學為終身恨獨我公者真其人哉
入接武於夔龍分宵旰九重之寄出齊驅於申虎控兵
民一路之權恩威已遍於西江冠冕直通於南極何封

疆之不改俾牙纛之重新惟草木素熟於威名故江山
不勞於指顧科條浹布畏愛愈孚位列九卿復參華於
朝著職嚴內直益增重於帥連恐未究於蕃宣已浸隆
於委寄朱簾畫棟喜聞圖任於舊人袞衣繡裳行見揚
休於天子某久叨屬吏又出師門覩帥垣壘拜於璽書
恨膝閣莫陪於珠履一邑如斗再依大邦節制之雄尺
素有書少效小夫竿牘之敬其為稱賀難盡編摩

賀給事鄒帥

王曜軒

綠底藉綸紅牙易閫煩公護太子久馬思羽翼之功借
君重淮陽示以歸禁閨之漸湘靈起舞嶽后前驅恭惟
某官道傳亞聖大賢之心文續先秦古書之脈虎榜首
登鳳池身到固地位之宜然鰲頭寵重鶴髮恩深尤人
生之鮮儷付科名於餘事守節誼之大閑方鼠穴權門
趨者成市而螭坳直筆屹然如山及調更化之絃時方
多事獨衛出疆之璧義不辭難入還班行進掌封駁誰
不批勅鮮有如何郊之力爭因此結知故每見殷浩而

輒喜居中未久丐外即行國事日新比貞觀初年而何
若君子一去覺開元朝士之無多心戀闕以常丹髮憂
邊而漸白惟有甘棠之蔽芾遠到海頭最宜叢桂之婆
娑久留春脚驪聲無地可著最課為天簡知太史夜占
喜長沙之星見行人朝發趣衡岳之雲開寶閣陞大學
士之班輜重奉太夫人之養衆皆爭先而稱賀僕知大
用之有階蓋當盛衰消長之交未決和戰依違之策春
秋復讐之義大乃素學之欲行英俊在朝則本強正善

類之所屬有以中書何無寇公為問者當以吾國即相
司馬而答之初立本奇更好黃花之晚節倘來不計直
垂汗竹之芳名伏念某讀書不多合世更寡比奉槐楓
之對空臆盡言不知草茅之疎轉喉觸諱甘輸三籌而
不悔僅泰一命以進身冬已及於瓜期夏方趨於蓮幕
始仕曰筮或者即初而覘終事長必忠安敢以順而為
正竦聞元帥來鎮此方幸以鄰壤之諸生得為油幢之
末吏雖素於左右本無介紹然見之方策不昧平生況

進士題名既接鳳雛之武而小人有母敢希燕喜之榮
倘推老吾老幼吾幼之心當無中不中才不才之間曲
憐臭味俾托帡幪待我不以衆人倘少垂於英盼因主
可以信客竊自激於懦衷

賀左史林侍郎出帥

戴象麓

光奉恩綸重開幕府圖書晉秩躋西清次對之星班牙
素益光增南浦朝來之雲氣封圻仍舊號令轉新某官
身負兩儀量包九寓聲名獨立斗魁第一曰天樞福慧

雙巖佛中八九分地位所養者得孔孟聖賢之定力故
發而皆皐夔翊輔之宏模粵從更化以來暨於嗣服之
始孤忠貫日一手補天上屢形宣室之恩公未薄淮陽
之治再三吐握陳使君之舊榻無塵十萬歌謠常觀察
之愛碑重揭方擬衣歸周之袞奈苦攀借寇之轅歌轉
上聞詔由中出乃睠畫棟珠簾之舊跡載煩金華玉筍
之儒英星分翼軫地接衡廬頓增氣象早作霖雨川用
舟楫行會雲龍某昔忝門生出冶鑄陶成之下茲叨屬

吏在車塵馬足之間況生乎吾鄉父母之邦又幸甚年
家子姪之列并四者美為一身榮機會鼎來精神益倍
禮因燕賀情露烏棲瞻東壁之星恨未際仙槎之便激
西江之水願少蘇洄轍之枯

上福建王帥

劉後村

叔子名高小煩裘帶淵明食少聊復絃歌隄瞻祭戟之
嚴冒輶箋題之敬某官三朝著俊萬古人豪行世雄文
若鯨魚之掣海立朝正色猶猛虎之在山當慶元則不

合於慶元至嘉定則弗容於嘉定中年勇退有君實晦
叔之風晚節後凋負元城了翁之望客傳詩句史載諫
書開白傳之草堂追遠公之蓮社生天成佛亦惟寓意
於彼宗臨水登山真若忘情於斯世肆我寧考粵今嗣
皇畀畿郡之麾符錫全閩之鈇鉞以君子長者之道待
其士以大慈平等之法視其民海波不驚年穀告熟然
而梁棟撓矣憂大厦之將顛風濤渺然橫孤舟而未渡
上觀天意下酌民言翊炎運於方興捨明公其誰望某

曲卷擁腫潦倒麤疎少慕功名蓋嘗中夜起舞晚更憂
患恨不十年讀書退然羨安校之封侯已矣為農夫而
沒世追記兒童之日早蒙國士之知豈謂白頭始紆墨
綬道傍易楮若為稱過客之情廷下裹鹽未免行賈人
之事而又巍巍大府凜凜諸臺常訶責於符移之中不
寬假於繩墨之外自投湯火甘守門牆倘眷衰陳稍篤
綈袍之念尚殫勤拙不為美錦之傷

上福建楊帥長孺

劉後村

謀帥大藩仰止十連之重效官小邑眇然一尉之卑問
戍役以凌兢望威風而震懾俯羞短輶仰闔高牙某官
學貫天人名垂宇宙秉心諒直凜乎若朱絲繩制行方
嚴截然如玉界尺生六一居士之故里荷誠齋先生之
嫡傳翰墨風流單行於世間文章政事並有乎家法入
登朝路未嘗辭金谷之塵出守輔藩決不飲苕溪之水
旋繇章貢易鎮番禺布陽和於溪峒創殘之餘扇清風
於嶺海炎熱之地凡所至郡千鍾之厚祿迨其歸山一

桀之扁舟郎署促還共嘆馮唐之皓首詔書數下莫回
巢父之掉頭屬者全閩難於作牧既欲寬明主宵旰之
慮未免回執事山林之心遂乘單車來建六縣通都大
邑無奸伏得容其間百姓三軍有父師之臨其上仁如
時雨之澤物威若霜風之摧枯尊名教以厚民彛唱文
風以起士氣施之郡國既令渤海之民安置之朝廷可
使淮南之謀寢會看召節入秉事樞某齒幼名微才庸
識暗先人大父有未復之青氈志士仁人頗興哀於葛

帔自嘆類景升之子誰曾聞蔡充之兒既莫紹於箕裘
又何辭於簞楚然而高堂垂白環堵屢空非敢為此身
干祿之謀庶幾效昔人負米之義踰瞻旌蘇預畏簡書
裏章服而拜上官行披符采受約束而詣大府一聽指呼

通楊安撫

危巽齋

疏榮中禁移鎮上流曉行湘水之春想難攀於舊轍日
賞岷山之景喜已近於來音拜履未皇馳箋徑達恭惟
某官千齡異稟四海芳名得於忠孝之傳加以淵源之

學政方流於花縣聲已達於楓宸屬多壘之為憂至奪
情而強起虎符竹使甫臨鎮於近邊鶴唳風聲已飛傳
於遠帥過師枕席之上折衝樽俎之間底定武功升華
戎監忽遠長安之日去開衡岳之雲平李愷之糴以備
凶荒明臯陶之刑以肅姦宄紅旗破賊既飛捷於九天
黃麻似經知告廷之即日適以封疆之慮尚勤斧鉞之
臨惟是襄州甲於京介最風寒之要處實天險之奧區
屬時傷創之甫寧如人尪羸之方起氣脈正資於護養

精神未暇於飾脩比問甲兵既非晉人之犀利旋觀營壘亦非諸葛之規模望公之車以日為歲得李牧而為守匈奴豈足憂哉有充國以屯邊羌人不敢動矣上既寬於北顧公即慶於東歸鎮撫有餘經綸何限某適官期之甫及服吏役以維新白鹿陂頭猥贊碧油之寄書牛關外忽傳紫氣之臨遙瞻行李之光深切望梅之意有河陽之幕以致溫造雖愧非材勒淮西之碑以頌晉公已思濡筆

通待制辛帥

林克齋

疇庸北固易鎮南昌棠舍陰濃不改江山之舊松堦望
峻載觀戟纛之新先聲鼎來闔郡欲舞顧趨承於末屬
尤感發於私衷蓋謂自三光五岳之氣分歎英豪其有
幾更四聖百年之治定慨功業之良難早聆季子之來
歸衆喜夷吾之復見使表餌得行其策則規恢豈俟於
今方期父老之椎牛開關持勞豈謂兒童之竹馬來道
候迎抑九重深軫於此方乃三錫重勤於老手某官蓄

雄剛之至德負超卓之奇才九卿高惟月之班四國徧
于蕃之績惟是胸中之湖海飄然與造物者游發為筆
下之波瀾殆非食煙火人語脫略軒裳之迹逍遙巖壑
之姿然而當世望其有為吾君引以自近旋由次對薦
畀輔藩居中則可寢謀於淮南捍外則尚何憂於江左維
咽喉之內地實襟帶於上流眷顧周行見大夫無可使
者儀圖宿望一敵國豈不隱然不妨玉節之重臨佇聽
金甌之有命某低徊一第連蹇半生素亡踰人矧未更

事猥玷公朝之薦口重慚計幙之素餐今逢十乘之啓
行欣託二天之覆露豈若秦之視越瘠曾不動心倘如
晉之用楚材或堪為役

通湖南葉帥

王臈軒

輟文昌之座以帥藩稍緩召歸之命著從事之衫而入
幕得為末至之賓以明公一日之去留卜賤子終身之
遇否仕莫重乎始進天固使之有依某官氣大而養以
剛道高而立於獨渠渠孝行每興感於蓼莪皦皦科名

曾收功於藥市守命義之大節為出處之宏圖鳧舄橫
飛鴛行增重考容臺三千禮司絕甚嚴為冊府第一官
采芸有詠方在開禧嘉定之際是為君子小人之交一
賢我豈以當前衆正得輿而交賀直聲大振雷轟電擊
於奸未去之先元氣不傷風恬雨霽於事已定之後絢
秘書於金匱石室導正學於廣厦細旃履聲上迫於雲
霄斧繡下臨於閩閩利源竭矣誰能寬之一分仁人恥
之不待去於三宿此舉盈廷之色動未曾前席之恩深

爰屈台斗之光俯照沙星之分潭府甚淳古分少陵岳
麓之清客堂喜空涼和吏部湘州之句政成而棠陰密
訟簡而鈺筦稀然當遠郊營壘之相望豈容明堂梁棟
之小用占諸道之奏最隱若長城左一席之久虛行膺
顯冊伏念某晚未見道窮坐為儒百戰蟻酣敢望錐囊
之先露一朝臚唱濫叨鐫脚之後塵父穉尚青而復還
母髮已白而待養若以苟祿仕則僅可漫不知幕辦者
謂何幸以部封下之舊民而為油幢底之新吏始仕曰

筮或者即初而覘終事長必忠焉敢以順而為正惟矜其臭味之似而許以幘幪之歸庶逭官箴可諧親養烏公鈇鉞之下倘見禮於溫生和相衣鉢之傳竊有心於范質瀆尊冒昧拊己凌兢

通建康帥張尚書

定叟

周山房

隆堂執訊甚慚妄冒以求知外學策名更懼庸虛而受察竊以十國連帥之重下視九品文學之卑敢以平生半面之私而後竿牘小夫之敬某官勲勞奕世文獻在

躬凡紹興討伐之規圖與衡嶽講論之宗旨公既得之於親授志在肯堂天復大之以全才刃游餘地而又遜却乎三事之位而惟恐身早貴周旋乎二紀之餘而能以事鍊心春秋未高而望已隆是非紛起而人不忌竊觀地位殆為時生今百年之否運將衰而四世之國讐未雪忍使中原之父老遺恨故國之世臣昔景略之孫尚存異代猶迎於灞上迨渭南之星已殞返旗足退於魏人佇觀帥鉞之策勛即自石頭而受冊某未能卒業

已迫為親方齒髮尚壯之時不知有己特科舉非工之
習何以教人自知非敢為人師所恃亦有執事在聞諸
道路屢辱齒牙方今名能半出題品豈伊拱把亦誤軒
衡涸轍枯魚聊借斗升之水託根小草敢登桃李之塲

通王安撫

真西山

錫之旄鉞寄以藩垣天子惠顧全閩肆輟西清近臣之
貴元戎肇開幕府聿新南郊遠服之瞻麾幟精明鼓角
謹亮某官清明莊栗博大魁閣接河汾夫子之傳未殊

源派攷會稽先賢之傳可嗣風流早以材大夫而為真
御史晁生有志欲復井田之遺孟子陳言首明經界之
畧恩被璽書之一札澤流寶婺之萬年孔門惟有冉求
可使治賦唐世獨稱行儉名曰知人亦既兼擅其能謂
當亟付以政三山非它鎮比繫國重輕九重俾我公行
問民疴癢觀臨遣光華之特盛蓋尋常牧守之所無淑
旂綏章式重韓侯之錫精金古器庸賁竒章之賢倚頒
一日之寬條立召八州之和氣赤子潢池之盜方幸晏

寧黃頭輯濯之師久稽整飭狐兔雖定於狡穴鯨鯢時
掉於驚波要當無事之時豫戒不虞之備澄清一道皆
猶枕席上之安張皇六師更賴帷幄中之畫某頽然暮
景來此舊邦屬政苛猛虎之餘有澤竭無魚之嘆吏稱
其職民安其業自愧未能實告於府情信於州方將有
待仰帥牙之俶建與兒齒以均歡公其肯效越人安視
秦人之瘠我亦自同晉國願分楚國之波

通福建安撫李尚書人同

方壺山

筍班聽履嘗親案座之光粉部褰帷密倚帥垣之重行
驅車而于役謹削牘以通名恭惟某官四海耆英西朝
魁彥中年突起兀北面之老蒼晚節後彫炯西邊之太
白自更化瑟徑上言坡衆驚成羣立萬年而不動羣暗
已瘡聳一鳳之孤鳴考其為諫官為御史以來略無結
宰相結人主之意晦叔雖介甫所厚安可囑以私溥夫
受溫公之知豈不言其過柏操凜然而不改荷囊捨我
以安歸人方期文靖之登庸朝已憚忠定之嚴整竟由

通綴出牧价藩俄勤宣室之思亟促曹裝之入顧輩流
已少寧復著筆硯其間况風景漸殊不忍見山河之異
蕭然浼視於黃閣歸哉聊擁於碧幢睠言閩都古號會
府弓刀鞞袴有華屬郡之儀鐘鼓園林常沾清時之樂
撫茲雅俗展也元戎仰惟今皇最倚黃髮典刑之訓有
如執事所謂白首魁壘之臣道行孰能止之時來恐不
免耳靡須席煖即聽袞歸某無夢鵷行已盟鷗社某丘
某水某樹樂方適於山中我任我輦我車命忽來於天

上循牆不獲叱馭敢稽念荃蕙不芳向自植者猶淺而
薜荔蒙恥今一出之何輕幸逢開府之新倘念承歡之
舊周原六轡遣以禮負愧皇華衛公八秩相於朝請賦
綠竹中丹所蘊副墨難殫

通招捕安撫陳待制

子華

鄭雪巖


十連開府載倚真儒半水脩文事新舊俗九霄綸綍一
道儀刑威德遠加精采特異竊謂有大識見則有大力
量有大議論則有大功名先零之服預決於金城上圖

之時淮蔡之清不在於雪夜銜枚之際先定其勝如照
燭辨白黑不蹶其趨如輕車駕平夷信馳騫搶攘非時
賢所能而弘濟艱難乃哲人之事天開聖化嶽生鉅公
雖當太平極治之時不無外夷小盜之警得一鄭公而
遼戎無慮有一文正而元昊何虞平益亂而整暇有餘
縛吳寇而聲色不動干將莫犯盤砥愈堅是為容邪消
弭之方無損壽祿延長之脈此全才曼出於斯世而百
年可數者幾人肯使前修獨專盛美恭惟某官闕天地

之運為廊廟之奇北山家學首傳性命文章之理一貫
東嘉水心高弟德行政事之科兩優總角結交無非老
蒼同時並遊不敢儕伍識者已期武侯於高卧見者咸
喜夷吾而無憂始居烏幕以前籌動無遺策退處周行
而入告進有嘉謀祇見諤諤盡言豈覲容容後福縱逍
遙空谷之往亦眷戀丹闕之深移孝為忠鞠躬盡力節
履險而後見機識時而可投敬觀前後表出師所陳何止
治安策太息而已非剗切回天之甚力將舒徐救溺以

徒勞帝為增屯公能作氣效收掌上敵在目中空其穴
巢矢之京觀方三路警聞於司寇俱未忘宵旰之思惟
七閩功書於太常宜特被褒嘉之詔事豫則立言無不
酬展也大成卓乎遠見憤茲餘蠢偃然逋誅又移建水
之旌麾來領洪都之斧鉞通班紫橐聊重建壇到眼珠
簾不妨緩帶戢止殘暴殄戮兇邪決非小小規模自是
挺挺風烈先聲丕赫逆酋請降征西比行璽書隨下居
東非久衮舄還歸要令四海之永清奚但十州之嘉靖

某幼而孤苦壯也辛勤恨不得諸老先生之宗空形夢
見幸竊聽宿儒名師之誨稍悟指歸頃嘗一得於公聞
蒙錄片長於優等心銘深感口誦弗違半生仰慕於龍
門昔無階而披霧三載訖辭於氍席今有路以依雲顧
荆棘險阻之備嘗而俎豆戰陣之兼問鶚正飛而誤送
鳥已倦而知還欲和荒屋蒼苔之詩寧起映水紅蕖之
想徘徊需代進退懷疑如不可辭尚托刺史二天之庇
或從其便即趨夫子數仞之牆立義精專陳詞膚淺



翰苑新書續集卷十一